



Dhaka nung Tirot Sing Syiem kürakyanglu
amenoktsü: Sanbor Shullai

Belinda Bencic-i Pan
Pacific Open kokogo



JVC & SYO-i asür Vihozhonu Zao atema temeten meshir

Dimapur, October 26, 2025 (TYO): October 25, 2025 nü ozü jala Vihozhonu Zao tepseter yuja aliba anguba atema kanga aoksar aser iba tatalokba khukhua aitsür ta Jakhama Village Council-i metetdaksüogo.

Arishi küm 22 tain Vihozhonu ya asür Keneithuto Zao'er jala lasü aser la ya college nung tekolok techira, saisapongtsü tejangra aser Basketball meimer ka liasü ta JVC-i sangdong ka nung ashi.

Lar kibong aser loktiliba atema lai shilem tajung aika agia aotsüba liasü saka iba tesempatsü mapa ajanga la arishi tembangtsüogo. Onoki iba tatalokba khukhua aitsür aser ozü jala taküm samaba ya kodanga meyipa mangutsü ta JVC-isa metetdaksü.

Bangdakpurtemi tekaratiba nung bushisüngdang asütsüla aser aibelener(tem) maitsü jangja aputsü mepishir Jakhama Village Council-i ashi.

Iba tatalokba bushisüngdangba nung tashishitsü melii inyaksüla aser aibelener(tem) ozüng

tesashitiba agi merenshitsüla. Bangdakpurtemi senso ajak aser talisa tetsürtem o tanurtem lendong nungi jenbua alitsüsa maparen akangshitsü ayongzüker ta JVC-isa ashi. Jakhama Village Council-i Vihozhonu Zao asüba ya amajok nung mesüidaksütsü saka temeten mangu tashi noktaksü ta parnokisa metetdaksü.

Southern Angami Youth Organisation (SAYO)-ia parnok züngsem Vihozhonu Zao tepsetba osang angashia kanga aoksaba metetdaksüogo.

Bangdakpurtemi tekaratiba nung bushisüngdang asütsü aser aibelener(tem) ozüng tesashitiba agi merenshia tasür kibong nem temeten agütsütsü ayongzüker ta SAYO-i sangdong ka nung ashi.

Ibala mesükba lendong ya mapang shia Nagaland nung ataloker aser iba ajanga pei lima nung tetsürtem kümzüka maliba tebilemtsü arur. Anungji state sorkar aser ozüng amertemi tarutsü nung ibala lendong mataloktsü atema mapa inyaksü ayongzüker ta SAYO-isa ashi.

Linük ajungalen Special Intensive Revision agitsü

New Delhi, October 26, 2025 (Agencies): Election Commission of India ajanga asüng linük ajungalen Special Intensive Revision of voter rolls anogo sangdongtsü imlar.

Mezüngbuba shilem nung election agitsü aliba state ana-West Bengal aser Tamil Nadu densema state 10 nung Special Intensive Revision agitsü. Iba shilem nung Assam, Kerala aser Union Territory of Puducherry adentsü ta osang angazüker.

Election Commission-i anogo asem tejakdang Delhi nung State aser Union Territory ajak nungi Chief Electoral Officers den senden ka mena liasü. Iba mapang parnoki Bihar nung ajangshiba lemsatep aser iba maparem tipatemsü jembitep.

"Bihar nung SIR maparen June 24 nungi September 30 tashi ita pezü jungnüa agi. Ajisüaka Commission-i mapang tatsüba akümtsü sentong lir" ta ketdangsür kati ashi.

Commission-i state aser Union Territory ajak dang taoba aser tang tamshidak

electoral rolls pre-matching asütsü tetuyuba agütsüogo.

Bihar nung SIR maparen inyakba anema Opposition-i ola adokba sülen SIR atema lemtet agi.

Iba ken o ya Supreme Court dangi aben aser okadaki acceptable identity documents ama Aadhaar dena amshitsü tetuyuba agütsü.

ECI-i Aadhaar taila amshiba indang onük benok saka Supreme Court-i "en masse exclusion" melenä "en masse inclusion" asütsüla ta ashi.

Bihar nung Special Intensive Revision agidang voter list nungi tenüng 66,000 shi agie. Iba ya deaths, duplication aser migration ajanga lir ta ECI-i kuli agütsüogo.

Ajisüaka, Opposition-ibo ibaji magizüker aser sensaker mesüra nübo agi tangar memenepertem tenüng agien ta ashir.

ECI aser BJP tsüngda tangatettep nung BJP nem votes aika ngudaksütsü atema iba mapa inyak ta Congress lennir Rahul Gandhi-ibo tai tongloktsüogo.

Longleng nung nisung 2 tsüksetba atema tensa mejungi lir Tanü tasür 2 nem tetushi agütsüba sentong ayongzüker



Dimapur, October 25, 2025 (TYO): Honibarnep 10:00 ako meta Longleng district kübok Pongo yimtsüng anasa gari agi nisung ana tsüksetba sülen Longleng jila nung tensa mejungi küma lir.

Iba lendong nung taküm samaba nisung anaprong ya Auching nunger liasü aser tena Longleng leni aodang Assam Rifles indang convoy nung gari kati tena mena aliba motorcycle nung atsük ta osang angazüker.

Assam Rifles convoy ya Tuensang nungi Jorhat-i aoerba liasü aser iba lendong atalokba osang angashiba sülen nübertemi Longleng town nung convoy sot.

Nübertemi tejashi nung driver aser gari parnok ket nung agütsütsü takhangba agütsü. Ajisüaka Assam Rifles sepaitemi ibaji inyaksü memulungba agi nübertemi tejashi nung AR meyong gari aika raksatsü.

Tensa süngjemdaksütsü atema District administration ketdangsürtem, police, aser kin teloktem tesem tonga ao.

Iba tatalokba atema bushisüngdang ka tenzüko ta ketdangsürtemi ashi saka Assam Rifles nungibo tang tashi osang kecha mali.

Iba lendong atema Phom Peoples' Council (PPC), Phomla Hoichem (PH) aser Phom

Students' Conference (PSC)-i October 27, 2025 anepdang 10:00 ako nugi Local ground nung rally ka alitsü ayongzüko.

Tasür ana nem tetushi agütsüba sayua aser ajaki mangyimer ta kuli agüja Longleng district ajungalen rally agiba mapang shishisilembadak, shisaliok rejutem, school aser college ajak shibangtsü ta telok asem külem sangdong ka nung metetdaksüogo.

Iba sentong nung class IX nungi temapur kaketshirtemi timi shilem agitsü aser asenok külemi longjemer tasürtem atema temeten meshitsü ayongzüker ta parnokisa ashi.

ENSF-i 'pen down strike' anentsü mepishir

Dimapur, October 26, 2025 (TYO): Joint Coordination Committee (JCC) ajanga Pen-Down/Tools-Down Strike ayongzüka atema tebilemtsü abener kechiyong iba ajanga sorkar office tem inyaksangshi nung tetsükdaksü ajurur aser public timtemer ta Eastern Naga Students' Federation (ENSF)-i metetdaksüogo.

Sorkar mapa inyaktertemi parnok khuretem lemsateptsü temeten agizüker saka ibala inyakyim law & service conduct sasep nung inyaksüla. Sorkar mapa inyaktertem ya public temulung alemertem lir aser sensotemi essential public

services mengui tim metemdaksütsüla ta Media Cell, ENSF-i sangdong ka nung ashi.

Ketdangsübaren nung tebilemtsütem ajanga nübertem nem timtem magütsütsüla ta parnokisa ashi.

Sorkar mapa inyaktertemi pen-down mesüra tools-down strikes ayongzüka mapa meinyakba ajanga essential public services nung tetsükdaksü ajurur aser public timtemdaksür ta ENSF-isa ashi.

Sorkari ketdangsübaren nung lemtet agiba ajakji jungjunga asadanger, asüngdangteper aser olemteper ang agir. Sorkari inyakyimtem lateta aliba ama aser

maparen shitak ajanga dang mapa inyaker ta parnokisa metetdaksü.

Anungji sorkar mapa inyaktertemi service framework sasep nung khuret aser mepelaba onüktem benoka lemsateptsüla. Sorkar ketdangsübaren nung aser public service delivery nung timtem agüja masü saka timi shidi züluba, asüngdangyaba aser olemteper ajanga item onüktem angatetteptsüla ta ENSF-isa ashi.

Iba lungkak aitba sentong ajanga sensotemi timtem ajurur anungji Eastern Region nung sorkar mapa inyaktertemi strike nung madentsü aser akhi ama office mapa inyaksü mepishir ta ENSF-isa metetdaksüogo.

NNC FGN ketdangpur tasentem shimogo

Dimapur, October 26, 2025 (TYO): Naga National Council (NNC) aser Federal Government of Nagaland (FGN) ketdangpur tasentem shimogo.

October 10, 2025 nü Oking, Kohima nung Tatar Hoho Session alidang ketdangpur tasentem indang election agia liasü aser parnoki October 23, 2025 nungi mapa agizükogo.

Tatar Hoho nung Kedahge (President), Kedallo (Vice President), Tatar Hoho Speaker aser Deputy Speaker atema election agia liasü.

FGN tenteter tang mezüng atema Kedahge menden atema election agi aser iba nung Eno

Kezha Angami shimtet. Tanüngba mendentem nungbo tetokteper maliasü aser Eno Thangou Khamniugan-i Kedallo, Eno Kenyuseng Kemp-i Tatar Hoho Speaker aser Eno Heno Lushing-i Deputy Speaker inyaksü shimogo.

Election agiba sülen Kedahge aser Tatars den külemi NNC/FGN ketdangpurtemi October 23, 2025 nungi mapa inyaksü nungloktsüogo.

Ketdangpur tasentem:

1. Gen. (Retired) Vivalie Metha, Advisor to the FGN
2. Eno Lhouvitsü Kesiezie, Nsa Midan (Chief Justice)
3. Eno V. Phutoi Zhimomi, Kilo

Kilonser (Home Minister), FGN

4. Capt. (Retired) Yirei Lungleng, Rali Wali Kilonser (Information and Publicity Minister), FGN

5. Eno Akho Meru, Aleo (Foreign) cum Infrastructure and Development Kilonser, FGN

6. Eno Kekhwechü Lasuh, Deputy Chaplee Kilonser (Deputy Finance Minister), FGN

7. Eno Pretso Khutso, Homaki Kilonser (Education Minister), FGN

8. Eno Dazü Ramai, Shenta Kilonser (Communication Minister), FGN.

Kohima nung meimchir temeden indang seminar ayongzük



Dimapur, Mongputeni/Oct. 26 (TYO): Northeast Support Centre and Helpline- Northeast Law Network ajanga Nagaland State Human Rights Commission den lungjemer "One-day seminar on Human Rights and challenges in Nagaland" sentong ka DPDB Conference Hall, Kohima nung October 25, 2025 nü ayongzükua liasü.

Iba sentong nungya civil society organizations (CSOs), kaketshir tentet tem, law students, St. Joseph Autonomous College, Jakhama nungi kaketshirtem aser Delhi nungi Avazeen Foundation team dena liasü.

Sentong nung Abel Ayemi, Advocate, NESCH-NELN, Nagaland office menden liasü aser Justice Songkhupchung Serto, Chairman, Nagaland State Human Rights Commission (NSHRC) ajanga sentong tenzükua jembi.

Human Rights ya timtiba jembi saka temulung magütsüba subject rongnung ka lir, ta pai ashi aser Universal Declaration of Human Rights puti otsü indang süoka jembi liasü.

Iba sangdong Article 1 nung "All men are born free and equal" ta aliba "All human beings are born free and equal" ta melenshiba atema India tsür Hansa Mehta nem tenüngsang agütsür, ta pai ashi.

Nisung meimchir temeden akumtsübobä ya tesunep asoshi tamendak dak lir aser yimjung lira rara malitsü aser iba yongji terenlok aser tejakleni aoba alitsü, ta ashi.

Küm ana NSHRC yagi Medical Hospitals, Public Schools, Public distribution system den State nung tashiyim amshiba indang repranga melenshitsü lenmangtem sayua liasü, ta pai ashi.

Commission-i ano minimum wages indang ken o benok, kong Northeast nung aliba state ajunga nung anogoshi aayangba taa küm asem nung khen melenshia arur saka Nagaland nungbo küm pongu tashi mereprangi liasü, anungji unorganized sector nung inyaker ajangzüksü mechi taa reprangshitsü state sorkar dang shiogo, ta metetdaksü.

Commission ajanga Chümoukedmia nung tepuokdak lia asüba ken o bushisüngdanga asür kibong nem sen lakh pongu agütsütsü ashiba ama sorkari agütsüogo aser jail indang ki o jena yanglushitsü shiogo.

Iba den ano Commission-i Organ Transplantation Act kübok ozüng yanglutsü atema tangatetba lemsatepogo, ta Justice Songkhupchung Serto-i ashi.

Dr. Alana Golmei, Advocate, General Secretary, NESCH ajanga metropolitan cities nung North-East nungi oa alirtemi Human Rights nung aibelena timtem ajuruba indang tongmelang agi lemsatepa liasü.

India senso süaka Delhi aser danga metro cities nung oa aliba northeast nisungtemi timtem jenti ajurur. Item rongnung 'racial discrimination', züka merenshiba, o tamajung ashiba, tim masüba mapa

inyakba, tepsetba, mapa inyakba tesem nung yimya meshidak amshiba, itasen magütsüba, kaket reju, mapa inyakba tesem, public spaces aser para kidang meshidaki amshiba lir, ta lai ashi.

Nisung aika shisaliok mesüra mapa tajungba agütsütsü tiazü nangzüker mesüzüka anir oa shibelener kabu nung tembangba indanga lir, ta lai ashi aser NESCH ajanga mera balala agiba indang lemsatepa liasü.

Iba sentong nung K. Arkha Achumi, Advocate, NESCH-NELN, Nagaland office ajanga "Land acquisition in Nagaland; laws and remedies" indang onük nung jembi liasü.

Terenlok maparen timba akumba ajanga northeastern states nung ali temeden onük jangja kumtar, ta pai ashi.

Pai iba mapang Nagaland Land (Requisition and Acquisition) Act, 1965 aser Right to Fair Compensation and Transparency in Land Acquisition, Rehabilitation and Resettlement Act, 2013 indang rateta shia liasü.

Oting nung lendong ajurua aliba kinungertem tenüng nung S. Pangai Konyak ajanga iba lendong atalokba otsü lemsatep aser ochi obendang agütsütsü nüngdaker ta ashi.

Ato Yim-i Indigenous land rights wazüka ayuba nung nüburtem teinyaktsü indang jembi liasü.

Sentong tembanga Advocate Benison Shohe, Advocate, NESCH-NELN, Nagaland office ajanga melepzüng o jembi.

Tetso College nung 10th NEIMUN 2025 agiogo

Dimapur, Mongputeni/Oct. 26 (TYO): 10th North East India International Model United Nations (NEIMUN) 2025 sentong Lorin Hall, Tetso College, Chümoukedima nung agia liasü. Iba sentong ya October 23 nü tenzükua liasü.

Asemnü mungdang ya "Youth and economic security: building a resilient future from the ground up" omen nung ajemdaker ayongzükua liasü, kong delegates, educators aser mongin tem adenshia alima nung tebilemtsü balala aser temelenshi arudaktsüba nung lanur shilem indang jembishinüa liasü.

Iba mungdang tenzükua

United Nations Day video ka sayu aser Sarah Zhimomi, deputy under-secretary general for publicity and delegate outreach lenisüba kübok agia liasü.

Kevithuto Neikha, secretary-general, NEIMUN 2025 ajanga pela agizükba o jembidang, lanurtem dang iba maongka agia pei bilemba lemsateptsü ayongzük.

Principal, Tetso College, Dr. Hewasa Khing-i jembidang NEIMU ajanga lanurtem academic tsütsü aser jurila takum yimya aintsü asoshi maongka agütsüba atema pelaba lemsatepa liasü.

Imtijungla Lemtur, EAC,

ADC Court, Dimapur ajanga rongsenketzüng sentongtem nung lanurtemi tongti shilem agiba indang jembi liasü.

Lanurtem tenüng nung Ayush Bhattacharjee, chief of international press ajanga digital putu nung osangbener temi timtem ajuruba indang jembi.

Maneni NEIMUN Youth Hall 2025 nung "Guarding the digital generation: law, rights and online safety" onük nung Rabindra Hazari, senior advocate, Bombay High Court and Supreme Court of India, aser Pangerkumzuk Longkumer, cybersecurity expert and founder, NexusCipherGuard India nati jembi liasü.

Dimapur Press Club-i asükhu lemsateper

Dimapur, Mongputeni/Oct. 26 (TYO): The Morung Express nung Wokha Correspondent aser Nagaland Tribune nunga osang agütsür Meribeni T. Kikon tetsü Zuboni Kikon, October 26, 2025 nü asüba osang angazüka temulung khurema jashiba lemsateper, ta Dimapur Press Club sangdong ka ajanga ashi.

Iba mangyim mapang Meribeni aser lar kibong den asükhu lemsateper aser Tulusang Tsüngremi parnok nem temulung nung anisüngzük, tashi aser tesunep agüjang ta sarasademtsür. Asür tanüla teti tatem maka tesunep nung anisüngzükjangma, ta DPC sangdong ajangasa ashi.

Dy.CM TR Zeliang-i "Nagaland Gold Tea" semzüksü



Dimapur, Mongputeni/Oct. 26 (TYO): Nagaland Deputy Chief Minister TR Zeliang-i October 24, 2025 nü Niuland district kübok Nikheku yimtsüng nung amenoka aliba Atoqa tea factory nung company tenüng "Northeast Brews" kübok product tasenba "Nagaland Gold CTC black tea" semzükja liasü aser pai factory manufacturing unit semdanga liasü.

Iba sentong nung Advisor, Industry and Commerce, Hekani Jakhali; Advisor, Animal Husbandry and Veterinary Services, Kazheto

Kinimi; Advisor, Youth Resource and Sports, S Keyoshu Yimchunger, aser MLA Beni M Lamthiu nungertem dena liasü.

Tea Board of India ajanga license agüja aliba Atoqa tea factory ya 2021 küm commission asü. Ibai süngo lu ali tasazük 150 acre nung lir. Ibai BLF (brought leaf factory) aser tenemtsüng len yimtsüng 11 nung ali acres 800 shi awajema small tea farmers 160 yarir.

Iba product ya yakta state aser danga North East states tem nung ayok tenzüksü, ta K Awomi (ops) ajanga metetdaksü.

Assam Rifles-i state nung sentong balala ayongzük



Dimapur, Mongputeni/Oct. 26 (TYO): Assam Rifles temi asür bilemteta Wreath Laying Ceremony ka October 25, 2025 nü Kohima nung agia tasü tait sepai temi duty nung takum bendanga agütsüba bilemteta aser akhum agüja liasü.

Iba sentong nung Rifleman (General Duty) Asür Ashok Saikia, Rifleman (General Duty) Asür Bharat Singh aser Rifleman (General Duty) Asür Surendra Kumar nungeri Nagaland nung telungpur den raraba mapang takum bendanga agütsüba asoshi akhum agüja liasü.

Iba sentong nung Assam Rifles personnel 165 dena asür nem akum tetushi agütsü.

Ano maneni "Fit India Freedom Run 6.0" nung shilem

ka ama aser "Swachh Bharat, Swasth Bharat" omen den lirumedema October 25, 2025 nü Assam Rifles temi Chümoukedima district kübok Medziphema nung Plogging Drive ayongzükua liasü.

Sepaitem temang anema alitsü aser libajen müreka ayutsü nükjidong nung iba sentong ya ayongzük, kong Officers ana, JCOs 12 aser danga ranks balala nisung nisung 80 shilem agia Garrison area nungi asemzüa aser plastic jana bendena liasü.

Iba inyakyim ya ajanga temang anema alitsü atema pei meket tesem müreka ayutsü tali ajungmesoa liasü. Iba mapang jana junga ketdang asütsü aser temang anema alitsü indang awareness agüja liasü.



October 26, 2025 nü New Delhi nung Army tongti, General Upendra Dwivedi-i 'Shauryaveer: Run for India' marathon tenzüksüdü tangokba noksa nung angur.

Cyclone Monthaagi Andhra Pradesh aser Odisha kongshitsü

New Delhi, Mongputeni/October 26 (Agencies): Bay of Bengal nung yipru ka tentetba sülen anüölen tsütsüleni odar; iba yipruji ano tesashiba akümtsü aser iba yipru ajanga Andhra Pradesh aser Odisha tzyüimkümlen aliba district aika kongshitsü, ta India Meteorological Department (IMD)-i metetdaksüögo.

October 26 tashi nung iba yipru tesashiba kümogo aser Hombarneep tashi nung cyclonic yipru akümba sülen Mongolbar aonung tashi nung Andhra Pradesh tzyüimkümlen Kakinada atongsü aser iba mapang nungji mopung ghonda ka nung kilometer 90 nungi 110 tashi kera aontsü, ta IMD-i metetdaksü.

Iba yipru dak sendakba nung Cabinet Secretary, T. V. Somanathan-i National Crisis Management Committee (NCMC) den senden mena iba yipru atema terenemshiba jenjang asadangogo. Iba senden nungji Tamil Nadu, Andhra Pradesh aser Puducherry nungi chief secretary tem aser Odisha Additional Chief Secretary nungeri yipru atema terenemshiba osang committee nem metetdaksüögo.

District Collector M.N. Harendhira Prasad-i, control rooms amenokogo aser helpline numbers 0891-2590102/0891-2590100 agütsüögo, ta metetdaksü.

IMD-i, October 27 nungi 29 tashi Andhra Pradesh

tzyüimkümlen aser Rayalaseema region nung tzyüinglu kanga arutsü, ta metetdaksü.

Odisha nunga tzyüimkümlen aliba district tem nung mopung ghonda ka nung kilometer 90 nungi 110 tashi kera aontsü aser tzyüinglua sashia arutsü, ta IMD-i metetdaksü.

Tamil Nadu aser tzyüimkümlen aliba regions nunga tsüngsang-mopung majungtsü, ta tekümdangtsü osang metetdaksüögo.

Odisha kübok Koraput, Malkangiri, Rayagada, Nabarangpur, Kalahandi, Ganjam aser Gajapati district tem nem 'red alert' aser tanüingba district 9 nem 'yellow alert' metetdaksü.

India nung tanur kata maliba school 7,769 nung tesayur 20,000 lir

New Delhi, October 26 (Agencies): India tesem balala nung sorkar school 7,769 nungbo school tanur kata mali, ajisüaka item school nung tesayur 20,000 dak tali lir, ta Union Education Ministry data ajanga metetdaksüögo.

Item school nungji tanur ka danga meliaka tesayur 20,000 dak tali aliba agi küm shia sorkar senpong nungi tesayurtem nem itasen agütsüba nung sen crore 1,800 indoker.

Samagra Shiksha Abhiyan kübok audit agidang iba osang jangja.

School tanur ka danga maliba school tem teimba aliba state ji Uttar Pradesh lir (school 2,890), iba sülen Bihar (1,350), Madhya Pradesh (980) aser Odisha (750) state tem lir.

Osang angazükba agi, item school ji teimbaka yimtsüngtem nung aliba school tem lir. Tanur asoba rate ajema akümba, yimdaklirtem aika jilatemi oa litepba aser nija school tem nung züngdaksüba kuli balala ajanga sorkar school tem nungji tanur ka danga mali, ajisüaka item school nungji tesayurtem nem maneni itasen agütsür.

Education ministry-i, item school shia nungji tesayur 2-3 shi lir aser küm ka nung tesayur shia itasen sen lakh 4 nungi lakh 10 tashi agütsür.

PM SHRI scheme asadangba mapang nung iba osang ya temai adoka liasü, iba sülen Centre sorkari state tem dang school tanur ka danga maliba school temji shibangtsü mesüra tanga school tem den

lokteptsü tetuyuba agütsüögo.

Uttar Pradesh Basic Education Department-i education ministry dang, 2022-23 kümsük nung school tanur ka danga maliba school 3,104 liasü, ajisüaka school kar tanga school tem den loktepba ajanga 2024-25 kümsük nungbo school tanur ka danga maliba school temji tangbo 1,297 dang kümogo, ta metetdaksü.

Bihar Education Secretary-i, Vaidyanath Yadav-ibo, yimdaklirtemi memelungba agi item ama school ji meshibangteter, ta metetdakja liasü.

Education ministry-i item school nung tesayurtemji tanur aliba school temi yoktsü aser school tazüingji tanga nüngdak atema amshidaksütsü tebilemba lir.

INDIA bloc-i Muslim nungertem 'Vote Bank' ama amshir: Nitish Kumar

New Delhi, October 26 (Agencies): Bihar Chief Minister Nitish Kumar-i, opposition INDIA teloktep nung lenirtemi Muslim nungertem ya "vote bank" ama amshir, ta tai tongloksü.

Nitish Kumar-i, opposition-i minority nütsüng (Muslim nunger) nem menden peria magütsür, ajisüaka parnoki Muslim nunger teyari agütsü atema asalentong balala yanglur, ta ashi.

Kumar-i X ajanga, "Yangi (Bihar) kodang election agidir lenirtem kari (opposition lenirtem) parnokji Muslim nunger meimertem ama sayutsü meranger. Iba ya tashioktsüba lir. Parnoki Muslim nungertem ya 'vote bank' ama dang amshir," ta metetdaksü.

Paisa, NDA sorkaribo lenla ajak nung Muslim nungertem nem menden peria agütsür, ta ashi.

"Onoki kecha bendangshidang mesüi parnok nem lenla ajak nung menden peria agütsür, ajisüaka taoba mapang sorkartemibo Muslim nungertem ya vote atema dang amshi, aser sorkar nung parnok nem tim shilem magütsü," ta

paisa metetdaksü.

"Ni item nüburtem (Muslim) dang parnoki (opposition) nangzükba sang nungji meshidaksütsü mepishir," ta pai metetdaksü.

"2005 küm jakdangbo state nung Muslim nungertem atema kecha meinyaktsü. Iba jakdangbo state tesem balala nung yimsü nung ajemdaker rara adoka liasü," ta pai ashi.

"2005 küm November 24 nü onoki sorkar tentetba mapang nungi tenzüka Muslim nunger terenlok atema onoki telemtetba aika agia inyaker. 2025-26 kümsük budget nung Minority Welfare Department atema senotsü 306 ben tutsüögo aser küm shia sen crore 1080.47 lemsütsür," ta paisa metetdaksü.

"Muslim nungertem atema Talimi Markaz aser Hunar ama schemes tenzükögo. Muslim nunger kaketshirtem aser lanurtem atema scholarships, angati coaching, hostels, grants aser tanga schemes agütsür. Entrepreneur Scheme kübok shishilembaba mapa tenzüksü atema Muslim nunger lanurtem nem teyari agütsür," ta paisa shisem.



October 26, 2025 nü Patna nung Bihar assembly nung opposition lenir aser RJD lenir, Tejashwi Yadav-i osangbenertem den jembidang tangokba noksa nung angur.

Diwali sülen Delhi nung alirtem aika temang nung timtem adoker

New Delhi, October 26 (Agencies): Anogo ishika tejaklen Diwali benjung amongba mapang nung firecrackers tali amshiba agi Delhi aser National Capital Region nung mopung kanga menena nüburtem aika temang nung timtem adokdar, ta survey ka ajanga bushitetogo.

LocalCircles-i online ajanga survey ka agiba sülen iba osangji sangdongogo.

Tang Delhi-NCR nung kibong pezü shia nungi kibong asem nungbosa temang nung timtem adokertem lir; item rongnung terok ashiba, aketba, tenük mesakba, tekolak menüba aser amoi junga moutetba densema lir, ta iba survey ajanga bushitet.

Central Pollution Control Board (CPCB)-i ashiba agi, Diwali sülen Delhi nung cubic meter shia PM2.5 level ji 488 micrograms tashi tuogo.

Diwali benjung mapang nung firecrackers amshitsü temelaba agüja liasü. Diwali jakdang den medemdangra tang mopung menenbaji asemnen agi tali lir,

kechiyong Diwali jakdangbo cubic meter shia PM2.5 level ji 156.6 micrograms dang liasü.

Iba survey nungji Delhi, Gurugram, Noida, Faridabad aser Ghaziabad nung alir 44,000-i shilem agia liasü. Kibong shilem 42 nung züngsem ka mesüra iba dang nungjagi tali terok mesakba ajangshir mesüra aketer, kibong shilem 25-i tenük mesakba, tekolak menüba mesüra ayip majangba ajangshiba lemsatet aser kibong shilem 17-i tangu junga mesashitetba mesüra 'asthma' tashidak tamajungba akümba lemsatet.

LocalCircles-i ashiba agi, kibong shilem 44-ibo kimai mayazüktsü meranger aser temang tashi itdaksüba chiyungtsü achi-ajemer. Ano kibong shilem 30-ibo doctor ajuruögo mesüra ajurutsü tebilemba lir.

Ano külen tanga osang ka nung, Delhi nung mopung menenba nokdangtsü atema October 28 aser October 30 tsüngda artificial tzyüinglu tendangtsü sentong lir.



October 26, 2025 nü Ghaziabad nung Defence Minister Rajnath Singh, Uttar Pradesh Chief Minister Yogi Adityanath aser Union Minister of State for Health & Family Welfare, Anupriya Patel nungeri private hospital ka semzüksüba sülen tangokba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, OCTOBER (MONGPUTENI) 27, 2025

Wholesale lenmang –

Dimapur nung anggo whole sale nung ayoker Naga nunger ka Naga nungertemi tsümar dena ayongloker pua bener aobaji Naga nungertemi kanga mebilemdangi inyakba matumalem mapa ka lir. Ango ayoksang tenüngji memetet aser kinjia memetet saka paji Naga nunger aser pa jagi Dimapur nung anggo whole sale nung ayoker ta dang metetet. Aji oda, Dimapur nunga Naga nunger rongnung anggo whole sale ayokertem rongnung Naga nunger-a lir ta angashi dang kanga pelar saka iba Naga nungbaji Naga nunger yimten nüshiso bushir telok tenüng amshia Naga nunger kari pua bener ogo ta angashidang, kanga jashir aser ano aji dang masü saka Naga nunger shishilembar ka pua bener aoertem rongnungji tsümartema densema liasü ta angashidang kanga tezü atanger aser akseta aiter aser Naga nunger nüchiso bushia-bushia matumalem kuma aoba anggo dang kanga shisabolua bilemer. Naga nunger ajak sentepa, Naga nunger inti meyong yimtijibo Dimapur ya dang lir saka Dimapur nungi angutsüba temoatsü aser tajangzükbo tulubalenka tsümartemi dang agir. Aji asenok mazüng mashi aser memetet aliba mapang tsümartem arua Dimapur nung shishilembaba mapatem ajak tenzükba agi, asenoki parnokji tashitemetet nunga aser tokolok agia aser oshi nunga memenepteti parnok kibur kümdaktsüba ajanga lir. Atangji, aji tesasatsüka saka asenok gari nunga memendang aser tenük agi train-a mangu alidang tangar tashitemetet lima nungi aruagi Dimapur nung kimong mesemteta shishilembatsü tenzük nungji, tang tashi anggo akong ayokba nungi alo beas aser jangotsü ajak aser chipo aonpo aser tsüngsem ayokba nungi süoshi aser yinsangra ayokba whole sale aser retail dokan ajunga tsümartem meyong lir. Anungji, tenüng agibo Dimapur ya Naga nunger meyong saka tagitsübo ajak pi keti aoer. Aji oda, asen meyong yimti nung talir, tachir, tajemer aser tagir ajak asenok aser asenok dang ayokertem ajakji tangar, anungji asen keti aruba sen ajunga tatem nungbo tsümartem senpongi aier. Item shishilembaba mapatemji, joko, tangbo asenoki parnok ket nungi belenzüka inyaktsüla aser inyaktettsü, saka tang amaji asenok nisungi asenok nisung shishilembaba mapa nung timtem agüja pua benersa ao nungbo, asenoki asen lima nung kibur kuma business meinyaktettsü. Ibaji linük tenzükertemi linük tenzükert masü saka linük ashioktsüba mapa ka asütsü. Dimapur nung jangotsü Marwari nungertemi ayoker, hardware oset ajak Bihari nungertemi ayoker, shi anggo, chipo aonpu, tsüngsem aser electronics osettem ajak Muslim nungertemi ayoker. Ashiko, asenok Naga nungertembo item nung jagi nisung kar 'tax' terara meshia kibong mesüa alitsüa akok, ajisüaka iba jagi kodanga asen kibong aser asen lima maintsü. Joko, jangotsü, alo beas, shi anggo, hardware aser software whole sale aser retail dokan ajak Naga nunger lanurtemi melentsüla. Tanü Nagaland nung Naga nunger government mapa nung officer ka ita senji Dimapur nung alo beas aser shi anggo whole seller kati anogo ka nung aaba sen dang nungi kanga agia tajemba lir. Iba lenmangji lanurtem ayongteper bushiang aser mapa inyaka takar kümang. Idangjiang asen lima renloksü. Joko, asenok backdoor nungi government mapai aitsü merangba putu süiogo aser tsümartem dang nungi 'tax' terara sarua asenok metsü meyoka alibaji parnok tsüngdang asenokji temenünütsüka akümer ta asenoki angatettsüla. Ibai Naga nungeri Naga nunger pua bener oa merenshiba mapang masü saka Naga nungeri Naga nunger dang shishilembaba lenmang tajung sayua ajungshitepba mapang lir, anungji shinga nema mezüngmeshi tesüdaktsü, saka tangari akümtsübuttsüa yaritepa whole sale business lenmang nung ajemokang. Mapai asenok atar, anungji mapai asenok bushia arutsü masü asenoki bushia oa amenoktsüla. Aji tasak masü, kijai meinyaktetra telok kümer inyaktsüla. Aji temela aser tajangzük aketba takoktsü mapa tajung lir.

OLEMSABANG

SHITI -THE LETTER

~ Marnungtet Ozukum

(Iba Yimdangjem otsü ya Tir Yimyim aser Bookipedia nati ayongba toktep nung mezüng takok jenjang anguba liasü.)

(Yashi adok nungi...)

Ita Ana sülen

Okola Nokinba ni aliba tesemi arua pelashishia küden jembi, pai kodanga yamaji pela shishia küden mejembitang, saka pa yimya ngua nia ni kanga pelar kechiaser telung nung tulur kati küden anepalua pelashishia jembi.

"Jungshi, mozü aser meim mozü na tebandang kechi lir?" Oko Nokinbai kü temulungjang ateta yia asüngdang;

Ni kenpika shisadang saka telangzuba tajung ka meshisatet, ni telangba kecha magutsu.

"Mozü aser meim mozü na tebandanji "tera talika achiba mesura achemba ajanga lir" "

"(The differences between medicine and poison is only a dosage away)" Okola Nokinba tebang nung moko tuluka perpa mekümer mokoji asüdoka ano english agia meyipzüka ashi.

Ni pai temesünger oshi jembiteter ta memeteti liasu. Pa tekabu nung pistol ka ama lira ser tekabu külen injang ka ama lir.

"Jungshi" pai maneni jembi meso, "Ochi aser tiyazu tebandangji injang ka tang lir" pai ola tesashiba nung mit adoka kuden jembi..... "world war 1 ji bomb amshia metenzük saka Archduke Franz Fredidant injang ka agi khasetba ajanga tenzük.....yamaji asen linük yanglutsü mesüra raksatsüji injang ka agi metettsü"

Okola Nokinba shisaka o jembiba nung ni kanga süngmanga pua-adok aser pa shisaka jembiba ni nukshia reprang. Pai ama aliba pistolji table nung züktaka yutsü aser pai envelope temelem asem table nungjisa tadongi zuktaka yutsü.

"Nai pistol amtetra, senji ne meyong saka nai pistolji mamtetra senji ne meyong masü " pai kanga nendaka tetsübuttsü jakden tener asüngdang. Pistol ka amtsü kechi tasak ta bilema ni pistol nungji amdak.

"Na teburchi, senji ne meyong, pistol aser injang linük meyong, ochi aser tiyazü bendangsü asoshi Tamsüba Tsüngrem meyong aser Tamsüba asü-limai yoktsu ne meyong. Nai pa taküm agitsüla, Linuk asoshi inyakng!" ;Pai küdang ojang ajak luteta nenshia ashi. Iba tetsübuttsü o jembi pa taktang nung aizüka ao aser pa sülen anidaker kati kü nem paper ka nung nisung tenung ka aser pa taliba tesem tejangjai agi zulur agutsü,

"Ne mezung mapa, Nai iba nisung khasetsula" Asangur sang jagi ashi.

Kechiba iba nisung tepstetsüla mesüra pa kechi tai inyak ni memetet saka Okola Nokinba jembiba O nung angadanga iba nisung yagi linük asoshi mapa mejungi kar inyaka alitsu sudi ta bilem, ni asoshi aji tongtibang masü saka ku-ket nung envelope temelem asem lir, kü taküm nung sen paikaji ku tekabu nung mamdangba, ni asoshi aji teperi liasu. Okola Nokinba ten ajurtepnüa ni taktang nungi adok saka Okola Nokinba ni mangu aser pa aruba jeep gari oer liasü.

Iba aonungsa küden ni ama asangur kum metsur-ana shika aser ano küm lir tsungda tebur ka, ozü asem sumo tata ka nung kohimai apusoa ao. Onok ket nung pistol bena lira ser police checking anaben tenji saka onok den tambusang jagi police den jembitsü aser, parnok nem envelope tera temelem amoktsü aser anepdang kohima oa atong.

Onok kohima nung ki ka nung anisüngzüka anogo anashi kazü, tasemnü aonung onok tang tambusang jagi pa den jeep gari nung aotsu ashi nung pa sülen anidaka ao. Tesem ka tonger pai ku nem pistol ka amoktsu aser kechi inyaktsu tasa ajak kudang rasa ashi. Pai ashiba ama ni Tamsüba kidangi tanemi par kinuk ka len nungi tanemi atu aser pa ayipdak tesem bushi ai. Pa ayipdak takdang nung table ka nung kaket aika nanga lira aser type writer ka lir, ano ken longshia reprang nung Nagalang map tuluka idaka lira aser ano kinuk kulen "Ochi Ajanga Yimjung" ta zulur liasu, aser pa yipden nung pa kanga sungjema mejanga liasu. Ni ken arendaka temulung muluteti, nia iba ama mapa ya inyaker nu ta kü-sasa mamangteti bilem saka ni pa taküm agitsu asoshi yok, aji meinyakra parnoki ku taküm rishikangshia tepsetsu akok, anungji ashiba ni ama aliba pistol ji ku tebok nung melepoka aliba nungi agizuk aser akatsu asoshi atenshidang saka ku mulungi maremtet, ku temeyongi pistol trigger nung tanaben amet saka ku takumi iba azü tokshitsü metizüktet saka ni meteti ku tenük amor pa teku nung injang ka aser pa tekolak nung injang ka kaloktsu. Ni shisa rama akum, ni koda koma onok anenzükba tesem atong ni metetet, ni pungmang nung asu asangsang ni memetet, ni kechi inyak aji pungmanger tang sudi ni kü-sasa mamangteti ni memeteti asüktema ajeb meso.

Taruba anepdangjisa onok aruba tata nung masü saka sumo ka nung ozu asem Dimapuri alu aser yangji okola Nokinba liasü aser ni memetetba nisung karden ajuruteper, ni ajitetba agi parnok Government nung tulur kar mesüker, par kimar tanüker sepai aika lir aser parnok garitem nung NL-G ta ajenloka lir. Onok pei pei yimtsüng oa, parnok nungi shiti osang maru tashi kidang police nungi atsüka atatsü teyu.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel nung Hezekiah chuba mapang aliba ali chipo ngutetogo



October 26, 2025: Israel nung archaeologist temi Judah Chuba, Hezekiah mapang amshiba ali chipo nung ozülu keta aliba ngutetogo.

Tejen Lai nung Hezekiah chubai Assyria chuba Sennacherib anema apusoba otsü lir. Sennacherib'er sepaitemi Yirusalem yimti longbanga liasü, ajisüaka Hezekiah aser par minister temi kanga sarasademba sülen aonung ka kija nung kotak tenyartemi Sennacherib'er sepai 185,000 samatsü. Iba tatalokba ya 2 Chubatem, 2 Putipuyang aser Isaia kakettem nung shia lir.

Ali chipo nung ajenloka alibaji iba tatalokba denji sendaktepa alitsüa akok, ta archaeologist temi bilemer. Ali chipo tejaxsaji küm 2,700

tejaklen amshiba asütsü.

Ali chipo nung ajenloka aliba nungji Judah Chuba tenüngbo ajenloka mali, ajisüaka iba tatalokba denji sendaktepa alitsü südi ta bilemer.

Temple Mount anüolen tsütsü jara anasa ali tua bushisüngdangba mapang nung Akkadian nunger oshi nung ozülu ajenloka aliba ali chipo tejaxsaji angu.

Ali chipo tejaxsaji Emek Tzurim nung Archaeological Experience nung inyaker Moriah Cohen-i ngutet.

"Jana merüktetba mapang nung ni noksa keta aliba ali chipo tejaxsaji angu. Ibaji jungjunga reprangba ajanga ozülu ajenloka alibaji ni reprangtet, ajisüaka zülua alibaji ni memeteti liasü.

Tesüiba küm aika tsüngda yangi osettsüset aika ngutetogo, ajisüaka tang anguba ama yabo kodanga mengui liasü," ta lai metetdaksü.

Laisa, "Küm 2,700 tejaklen aliba ali chipo nung mezüng kongshisangji ni lir, ta meteta ni kanga pelaa liasü. Akümüli nung yamai khen dang nguteter," ta ashi.

Israel Antiquities Authority (IAA) nungi Dr. Ayala Zilberstein-i, tang ngutetba ali chipoji ajanga Assyria yimli aser Judah yimli tsüngda tongtepratepa aliba kuli jangjar, ta metetdaksü.

"Iba ya ajanga Yirusalem nung Assyria nunger aliba aser parnoki Judea yimli nung shilem agiba jangjar," ta paisa shisem.

Online ajanga pei yimsü lemsatepra Khristantemi timtem ajurutsü

October 26, 2025: India kübok state ka nung anti-conversion ozüng ka yanglushiba ajanga Khristantem aser tanga minorities-i online ajanga pei tamangba yimsü lemsatepra timtem ajurutsüa akok.

Tang yanglushiba ozüng 'Freedom of Religion bill' ya ajanga digital media nung pei yimsü lemsatepba nokdangtsüa akok, aser ibaji ajanga online ajanga pei yimsü lemsatepba Khristantemi timtem ajurutsüa akok.

Iba bill pusemertemibo, iba ozüngji ajanga yimsü temeden kümzüktsü aser nüburtem tesünep nung alitsü ta ashir, ajisüaka atangji nungbo iba ozüng ya ajanga pei tebilemba sadoka jembiba nokdanger aser iba ozüng ya talisa Khristantem anema lir.

Uttarakhand state nung ozüng tasenba kübok online ajanga pei tamangba yimsü lemsatepba nokdanger.

Global Christian Relief CEO, Brian Orme-i, "Iba ya taoksatsüka lir. Iba tenokdangba ya ozüng tesashiba rongnung ka lir. Iba

ozüng ya pei tebilemba jembirtem, yimsü meyiptsü tebilemba alirtem aser pei yimsü lemsatepertem anema lir," ta metetdaksü.

Orme-i, "Nü taküm kuli lemsatepba, Lai tekong ka lemsatepba mesüra nü yimsü lemsatepbaji ajanga nü yimsüji tangar dang nungi tajungba ta züngshitsü aser tanga kuli meliaka na aputsüa akok," ta metetdaksü.

India nung pastor tem aser sayutsüngirtem aikati online nung parnok lemsatepba alibatem agien tenzükogo.

Orme-i, "Parnoki parnok meyong YouTube channels agien tenzükogo. Parnoki social media nung lemsatepa aliba agien tenzükogo, aser karibo state toktsür aotsü bilemer," ta ashi.

Orme-i, "Khrista tenüng nung kar nem chiyungtsü agütsüba-a nokdangtsüa akok. Khristan organization ka ama na timtemi aitsüa akok," ta ashi.

Iba ozüng kübok apurtem mesüra tai tonglokja alirtem anema aibelenba kuli mangu tashi parnok aija alitsü.

Iba ozüng kübok

aibelenertem dang senchi dollar sen 12,000 tashi achitsü aser küm 3 nungi tenzüka taküm piyong tepuokdak ayutsüa akok.

Iba dak alia anti-conversion ozüng tasenba kübok pei yimsüji tangar yimsü dang nungi tajungba ta jembitsü memelar aser digital ajanga pei yimsü prokba nokdanger.

Iba ozüng nungji 'Khristantem' ta tetshia mali, ajisüaka iba ya India nung Khristan yimsü prokba nokdangtsü nükjidong nung lir, ta pai metetdaksü.

Tang India nung state 12 nungbo anti-conversion ozüngtem benoka lir, ajisüaka Uttarakhand nung tawa yanglushiba ozüng yagibo digital media-a nokdanger, aser iba ya tanga state temi tatishitsüka ama agitsüa akok, ta Orme-i metetdaksü.

India nung Khristantem atema online ajanga pei yimsü proktsüji tasak asütsü, ajisüaka alima nung democracy linük tulutiba nung tamangertemi maneni Khrista osangtajung lemsateptsü imlar, ta paisa metetdaksü.

ANOGO ABEN TSÜNGREM DEN

Anogo shia taküm Mathi 4:18-22

Ni kechi koda Khrista chilu ajir, yamaji nenoki kü chilu ajiang. 1 Kor. 11:1

Yisu mapang nung tangazüker jagi mapa agi sashisashia sayua angazükdaktsü. Tesayur tulu kübok angazükba tetezü nütsüngtemji parnok tesayur den ali. Tangazükertemi masterba philosophyji dang angazük masü saka parnoki parnok master anogo shia takümji ajia ali. Nütsüngtemi parnok tesayurtem ama alitsü bushi.

Yisu nütsüngtemi anogo shia ajak nung Pa sülen anidak. Parnoki Pa O tem angashi. Parnoki Pa den ango apui ao aser Pa den külemi jaja. Pai shirangertem anebtsüba parnoki angu, nükpoker tenük lapoktsüba, ayabatem mesüba parnoki angu. Item nütsüngtemi Yisu tesayuba dang metet masü, parnoki Yisuji tesayur ka ta metetta liasü. Pai metetba parnoki metettsü merang. Pai inyakba chilu parnoki ai.

Yisui asenok nütsüngsüba dangi ajar. Asenoki Temeshi Laishiba nungi Pa ajaba ola tulu angashir aser Pai anileni anidaker. Asenoki Pa den mapang agira, Pai asenok langbang nung amener. Pa asenok den jajar. Asenoki Pa atenba memetetra, Pai asenok meketa sayatenya inyaker.

Yisu sülen anidakba tetezü, Pa tesayuba metetba kisüngji masü. Tsüngrem taochi ajanga, ibai tesayurji metetba lir. Ibai shibai kilir ka asütsü nung temenen pur ajak tekümtet asoshi kangki nung asü Pa metetba lir. Pa teyari ajanga asenoki Pa ken metetra asenoki Pa akümtsü merangtsü.

Asenok ajaki Yisu den jajatsü merangdi; Pa tatishitsü nung merükteta anidakdir.

Egypt nung olulu ka nung ajemdaker Khristantem anema apuso

October 26, 2025: Egypt CSW nung Chief nung Minya Province nung Executive, Scot Bower-i, Khristan kati Muslim tsür ka "Yimsü nung ajemdaker loktii den tesendaktep ayur, ta olulu ka prokba sülen October 23 nü Muslim nungertemi Khristantem anema apuso, ta osang ka ajanga metetdaksü.

Christian Solidarity Worldwide (CSW)-i, social media nung tesempa o prokbaji Khristantem anema apusotsü nükjidong nung Muslim nungertem ajungshiba lir, ta metetdaksü.

Social media nung olulu prokba nung ajemdaker Nazlat Jalf yimdak Muslim nunger aika adenshir Khristantem meyong kiojen aser alu raksatsü.

Police-i iba tensaji azüokteta liasü aser nisung aika apu. Tensa meraksatsü atema ketdangsertemi senden ayongzüka agidar.

Upper Egypt nung mapang shia Muslim nungertemi Khristantem anema inyaker, ajisüaka ketdangsertemi aibelenertem anema inyaktsü melen telok balala külem senden ayongzüka parnok tsüngda tangaatettep nung ken o bangjemdaktsütsü dang meranger.

CSW nung Chief Executive, Scot Bower-i, "Yimsü nung ajemdaker loktii amakba ya tai maketertem anema inyakba dang masü saka iba ya meimchir temeden aser meimchir akhümket anema lir," ta metetdaksü.

"CSW-i police dang aibelenertem anema inyaktsü akhanger. Nazlat Jalf yimdak tatalokba ya jungjunga bushisüngdangtsüla aser tesempa agi olulu prokba aser yimsü balala amanger tsüngda rara adoktsü ajungshiba ya jungjunga nokdangtsüla. Egypt sorkari aibelenertem nem temerenshi agütsütsüla aser senso ajak kasa züngshitsüla," ta paisa metetdaksü.

Egypt nung mapang shia telok balalai Khristantem anema inyaker. Islamic State densema telok balalai Tenla kitem aser Khristantem kiojen raksatsür. Iba linük nung Khristantem ya 'second class' sensotem ama züngshir.

Iba tebilemetsü onük nokdangtsü atema sorkari telemtetba karbo agia inyaker, ajisüaka Coptic Khristantem aikati, sorkari parnok nem security peria magütsür ama bilemer.

AO OSHI ANGAZÜKDAK:**TANÜ ANGAZÜKTSÜBA OJANG****Tonga**

(adv) tatem tashi aoba (go till the end)

* Onoki shiranger tonga oagi semdang.

Tongbang(n) takartsüri tenarong nung anoba
(crystal type earing worn by rich women)

* Akhidangbo takartsürtemi tenarong taazüka alua tongbang anorsa angu.



Tir Yimyim

OLONG PAITEP # 7311

1		2		3		4	5			
				6						7
		8								
9				10		11				
			12					13		
						14				
16										
						17				

TIPIEN

1. Nisung jenti
4. Tsük rudenba
6. Temzüng tesashi
8. S _ _ _ i
9. Nisung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7310 TELANGZÜBA**TIPIEN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER

China nung CR450 high-speed trains ajanga tawa recent trials nung 896km/h speed adenogo aser iba ya world record ka lir ta China Academy of Railway Sciences (CARS)-i metetdaksüogo.

Iba record speed ya Chengdu - Shanghai high-speed line nung Wuhan - Yichang section nung yangluteta liasü.

CR450 trains ya taküm April ita nungi high-speed lines nung tendanga arur aser train temi 600,000 kilometre tashi test asüba sülen ang revenue service nung amshi tenzüktsü.

Manipur-i Japan dangi Chakhao jang yoktsü**Imphal, October 26, 2025**

(Agencies): Manipur Agriculture Department-i mezüngbuba Bharat International Rice Conference (BIRC) 2025 nung shilem agitsü renemer.

Iba mungdang ya October 30 aser 31 anogotem Bharat Mandapam, Pragati Maidan, New Delhi nung agitsü.

Iba mungdang ya Indian Rice Exporters' Federation (IREF)-i APEDA den yaritepa ayongzüker aser India ya rice supply chain nung global leader kümdaktsütsü nükjidong lir.

Linük 80 tema nungi foreign buyers 1,000, farmer organizations 3,000 aser exporters, millers, & allied industries 2,500 shi iba mungdang nung adentsü imlar.

Manipur state tenüng nung

Farmer-Producer Companies (FPCs) pezü, entrepreneurs 2 aser Agriculture Department nung senior officers adentsü.

During the event, Japanese, Korean, and Chinese delicacies will be prepared using Manipur's famous Chakhao Black Rice and Chakhao White Rice to promote these unique varieties in international markets.

Iba mungdang nung Manipur nung nüngtugu jang Chakhao Black Rice aser Chakhao White Rice ajanga Japanese, Korean, aser Chinese delicacies renemtsü aser iba ya international markets nung jang ajungkettsü atema lir.

Department of Agriculture, Government of Manipur-i APEDA den MoU ka nung sign süteptsü aser iba ya November-

December 2025 tsüngda Japan-i Chakhao White Rice 20 metric tones yoktsü atema lir.

Department of Agriculture-isa Kharif 2026 nungi tenzüker black aser white Chakhao rice teimba ayimtsü atema sentong lir.

Parnoki aluyimer nem subsidised inputs aser hi-tech milling facilities agütsütsü.

Aluyimertemi item jang export asüba ajanga senotsü tajungba angutsü atema state sorkari APEDA den külemi inyaka arudar ta ketdangsürtemi ashi.

Department-isa aluyimertem dang double paddy cropping ajanga Chakhao Black aser White Rice ayimtsü ajungshir kechiyong international markets nung item jang ya kanga sapur.

Dhaka nung Tirot Sing Syiem kürakyanglu amenoktsü: Sanbor Shullai**Guwahati, October 26, 2025 (Agencies):**

Dhaka, Bangladesh nung Khasi freedom fighter Tirot Sing Syiem indang kürakyanglu ka taküm küm tetenzüklen raksatsü saka iba meleno ano ka yanglutsü ta Meghalaya nung Arts and Culture Minister Sanbor Shullai-i ashi.

Iba mapa inyaktsü atema Bangladesh nung Indian Embassy den asüngdangteptsü

ta Shullai-i ashi.

MDA-I sorkar mezüngbuba kümsük nung iba kürakyanglu yanglua liasü saka taküm Dhaka nung mepetmesü adokdang raksatsü.

Iba mapang Tirot Sing memorial dang masü saka Bangladesh founding father indang kürakyanglutema raksaja liasü ta Minister Shullai-isa ashi.

Pai Commissioner and Secretary F Kharkongor den restoration project atema asüngdangtepogo aser Dhaka tonga oa iba mapa inyakba repringtsü ta ashi.

Tirot Sing Syiem ya putu 19 buba nung Khasi chief ka liasü aser pai Khasi Hills nung British colonial expansion anema rara. Meghalaya putiotsü nung pa ya kanga dang tongtipang nisung ka lir.

Manipur Customs-i Myanmarese kozüjang seret 8,000 apu**Imphal, October 26, 2025**

(Agencies): Customs Division, Imphal-i Manipur Police den yaritepa mita aodang kozüjang seret 8,099 puogo aser regional black market nung iba jenjang Rs 32 lakh shi asütsü.

Kozüjang ya Myanmar nungi Manipur tashi gari ana nung bitumen ta tiyazü shia bener aru ta ketdangsürtemi ashi.

Iba mapa inyaker nisung 2 aser gari ana puogo. Ajisüaka

ketdangsürtemi parnok ya kong apu'ar mashir.

Kozüjangji Tata 12-wheeler truck (Reg. No. WB-26-D-0886) aser Ashok Leyland truck (Reg. No. AS-26-C-9521) nung bener aru aser gari anaprong nung drivers & conductors ajak Customs Division, Imphal ket nung agütsüogo.

Myanmarese supari (Myanmarese betel nut) ajanga cancer adokdaksür aser iba jagi

India nung iba kozüjang ya ozüngi noktanga lir.

Alima nung kozüjang ya kanga bulua amshiba psychoactive substances ka lir. Manipur nung nisungtemi nisungtemi kozüjang ya mild psychostimulant effect atema lime, spices, aser tobacco den meykotepir achir.

Talisa kozüjang ya Ayurvedic medicine aser Meitei religious ceremonies nunga amshir.



Assam sorkari Sonapur nung kentener Zubeen Garg indang nüngshilung Zubeen Kshetra semdangtsü atema mapang atsülangogo. Zubeen Garg Fan Club ajanga iba nüngshilung semdangtsü atema ayaterm tashi melatsü mepishia liasü aser iba nung ajemdaker sorkari ghonda ka atsülanga anepdang 6:00 nungi aonung 11:00 ako tashi semdangtsü temelaba agütsüogo. Iba tesem nung yi mesüra temesepba achiajemtsü ajak noktanger ta ketdangsürtemi nenshia metetdaksüogo.

Trump-i ketdangsüa Thailand-Cambodia ceasefire atema nangzüktep

Kuala Lumpur, Mongputeni/October 26 (Agencies): United States Tir Donald Trump-i ketdangsüa Thailand aser Cambodia na ceasefire atema sign sütepogo. Trump tanaben Tir akümba sülen tang mezüngbuba Asia semdangba mapang pai shishilembaba tsütsü tenangzüktepba balala yangluba sangdongogo.

Kuala Lumpur nung Association of Southeast Asian Nations (ASEAN) summit agiba mapang Deobarnü Trump-i Malaysia, Thai aser Cambodia nunger lenirtem den iba ceasefire atema tenangzüktepba nung sign süogo.

ThailandAto Kilonser Anutin Charnvirakul, Combodia Ato Kilonser Hun Manet, aser Malaysia Ato Kilonser Anwar Ibrahim nungeri iba sentong nung shilem agi, koba ajanga July ita linük ana arrtsü nung azütokshi lendong tulu adoka raratepba tembangdaksüogo.

"Nisung aikati minyaktettsü ta ashiba mapa ka onoki inyakogo," ta Trump-i ashi.

Anutin-i ashiba agi, iba

tenangzüktepba ajanga teti asoshi yimjung benoktsü atema tamendakdak tajung ka yangluogo. Hun Manet-ia, iba anogo ya otsüsütsü anogo ka lir ta ashi.

Anwar-i ashiba agi, iba tenangzüktepba yangluba ajanga longjemshiba ya takhangba ka asoshi bendanga agütsüba ka masü saka tasü aitba inyakyim ka lir, ta nenshia metetdaksür.

July ita Trump-i rara anendaktsütsü atema linük anaprongla dang tariff timba meshitsü amokmerenba sülen tangatetep ka dangi aru aser tang yimjung atema tenangzüktepba ka yangluogo. Linük ana tsüngda anogo pongu raraba mapang nisung aika tepset aser meyirejang aika pei talidak ki toktsür jenshia aotsüsa aküm.

Tenangzüktepba mezüngbuba shilem nung Thailand-i Cambodia nunger sepai 18 chioktsü aser arrtsü nungi prangbong tulutem aser landmine tem agintsü, aser rara tenzükshitsü aliba nokdangtsü asoshi Malaysia nunger

sepaitem yoktsü mulungtepa liasü.

Thailand aser Cambodia na arrtsü km 800 lir aser 1907 küm France-i achaayanga arrtsü nung tenangzüktepba yangluba mapang arrtsü junga lateta mayuba ajanga iba küm nungi linük ana tsüngda mangatettep adoka arudar.

Taküm mangatettep ya Laos den arrtsü nung tesem ka aser ano Angkor Empire mapang yangluba küm 1000 tain temple tem amenoka aliba tesem ka nung adoka liasü.

Deobarnü ceasefire nung sign sütepba sülen Trump-i Cambodia, Thailand aser Malaysia nunger den tenangzüktepba balala nung sign süogo aser Bangkok aser Kuala Lumpur na den tongtibang mineral tem dak sendakba nung tenangzüktepba yangluogo.

Tenangzüktepba nung linük asempronglai US indang export aser talisa US indang aluyim dang amshiba osettem nung tenokdangba agütsür aliba timba agintsü mulunga agizükogo.

(Maneni tapak 8 nung...)

Russia-i missile tasen ka tendangogo: Putin

Moscow, Mongputeni/Oct. 26 (Agencies): Russia-i nuclear tashi aketba cruise missile tasen ka tendangogo, koba ajanga tang aliba mitkar tem aoksadaktsütsü akok, aser mitkartemi amshitsü anasai arur, ta Tir Vladimir Putin-i jembiba o ka Deobarnü metetdaksü.

Putin ya camouflage fatigues süoshi semer Russian mitkar lenirtem den ajurutepba video ka Kremlin-i sayaa liasü.

Iba video nungya Russia indang chief of general staff, Gen. Valery Gerasimov-i Russia tir dang Burevestnik ya Mongulbarnü tendangba nung meta 14,000 kilometers (8,700

miles) ao ta shia liasü.

Burevestnik mesüra Storm Petrel ya mopung nung ghonda 15 tashi liasü aser aji tatem masü, ta Geresimov-i ashi.

"Asenoki iba hadir amshitsü tejangja metettsüla aser asen armed forces nung item nok-nü amshitsü atema infrastructure renem tenzüksüla," ta Putin-i video nung Gerasimov dang ashi aser missile indang tatem bang tendangba atema inyaktsü tuyua liasü.

Putin-isa tang aser tarutsü nung missile defenses meraksatsütettsü, kechiaser ibai meta tatakzük ka maka aser pa jajaba lenmang

metakzüteter, ta ashi.

Bodhbarnü Putin-i Russia indang strategic nuclear forces indang drills agitsü tuyua liasü. Ukraine dak sendakba nung US Tir Donald Trump den senden amentsü sentong aliba athiba mapang ka nung iba exercise ya agitsü.

Iba exercise nungya Russia northwestern tsütsü nungi tendangba intercontinental ballistic missiles aser Barents Sea nung aliba submarine ka densema Moscow indang nuclear tashi ajunga amshitsü. Drills nungya Tu-95 strategic bombers amshitsü, koba ajanga long-range cruise missiles khaloktsür.

Sudan nung RSF aser SAF tsüngta rara tesashiba akumer

Khartoum, Mongputeni/Oct. 26 (Agencies): Sudan nung linük kübok North Darfur nung aliba el-Fasher yimti nung tang tesashiba rarar, kong Rapid Support Forces (RSF) paramilitary group ajanga sorkar den sendaktepa aliba Sudanese Armed Forces (SAF) alidak tesem ka agiogo ta ashir, koba linük anüolen SAF tashi ita aliba tesem tatem bangba amai lir.

"Sudan army meyong Six Infantry Division ta ajaba base ya anogo aika raraba sülen agia liasü," ta linük yimtiba Khartoum nungi osangbener kati Deobarnü ashi.

RSF yagi tesüiba ita 18 tashi el-Fasher yimti ya lungbanger liasü, kong parnoki Sudanese army aser parnok den sendaktepa aliba telok den rara aru. Parnoki drone aser artillery amshia civilian dak aiben amak aser lungbanga ayuba mechi yimti nung alirtem timtem balala ajurua yasa-tzüra agi asüng, kong nisung 250,000 taolen makai lir.

SAF-i tang atalokba indang nung osang agüja mali.

Tesem ajungalen lungbanga aliba mechi military base nung army temi sepaitem mesüra nok-nü yoksemtsü makoker.

El-Fasher ya RSF atema military aser political tsütsü takok tulu alitsü aser linük sadangba tekeraba kuma paramilitary telok-i Darfur region tulu azüokba akangshitsü.

RSF-i iba yimti agiba ajanga linük south tsütsü Zamzam camp agiba sülen amakba ama kin balalai amaktsü akok, ta activists temi ashir.

El-Fasher nungi civilian

tem adokdaktsüba aser yangji fighter tem temai adokba nung yariteper, ta taoba hopta RSF-i ashi, saka iba yimti yutsür ainshirtem dak RSF sepaitemi rakzük raktemba, tim masüba mapa inyakba aser tepsetba osang lir.

El-Fasher amakba mapang RSF-i nisung meimchir anema mapa tamajung jenti inyak, ta United Nations-i nungloktsüba mission kati taoba ita shia liasü. SAF-ia tashiyim mapa inyak ta tai tonglokja lir.

Tanur meyirijang aika asütsü tia nung loir, kechiaser parnok chiyongtsü aser healthcare mangur, ta UN agencies pezüi tan hopta tekum dangtsü shia liasü.

Mongulbarnü RSF-i power infrastructure nung amak dang yimti aika nung electricity raksatsü aser yangji mapa inyaker nisung trok yiru.

Hokulbarnü agi anogo pezü buba RSF drones ajanga Khartoum International Airport nung tenük yoker amak, koba army temi March ita tanaben agiba sülen tanaben lapoktsü teimla liasü. Ajisüaka iba airport tanaben lapoktsü sentong ano thinenogo.

Iba rara ya April 2023 nung tenzük aser tang tashinung nisung meyirijang aika tepsetogo, million 12 shi tesem balala nung prokshia lir aser ano nisung 30 million shi teyari nüngdaka lir, anungji alima nung humanitarian crisis tulutiba kuma lir.

KIMONG AYOKER

KIMONG 40 X 100
Dimapur
ALANGZUKA
AYOKTSU
PH- 8257806092



Veterinary Council of India

(Statutory Body of the Ministry of Fisheries, Animal Husbandry and Dairying, Government of India)
'A' Wing, 2nd Floor, August Kranti Bhawan, Bhikaji Cama Place,
New Delhi - 110066

NÜBURTEM DANG SANGDONGER

(Recognized Veterinary Colleges nung 15% VCI Quota kübok admission atema VCI Online Counselling)

Academic year 2025-26 atema recognized Veterinary Colleges nung **15% All India Quota kübok B.V.Sc. & A.H course** nung admission atema VCI counselling asoshi Online Registration **October 8, 2025** nungi tenzüksü metetdaksür. Counselling aser menden lemsatsüba ya online aser National Eligibility cum-Entrance Test (**NEET-UG-2025**) nung Qualified merit list nung ajemdaker alitsü.

Veterinary Colleges tenüngtem, number of seat matrix, counselling schedule, registration fee, Information Bulletin etc. ya website: www.vci.admissions.nic.in & www.vci.dahd.gov.in nungi download sütettsü.

Dated October 2025

New Delhi:
CBC 01222/11/0002/2526

Dr. Rongsen Lkr
Secretary VCI

AO RIJU SANGDONG

Ao Riju-i Achaayanga Agiba Arangtet Tatidang Mongputeni1-3, 2025
Takok Angurtem Yamai Sangdonger:

ACT 201-202: Tatidang agütsür : 1 Takok angur : 1

2nd Division: Roll No.1

ACT 301-302: Tatidang agütsür : 1 Takok angur : 1

3rd Division: Roll No. 1

ACT 501-502: Tatidang agütsür : 2 Takok angur : 2

1st Division: Roll No. 1 & 2*

ADT 101-103 : Tatidang agütsür : 5 Takok angur : 5

1st Division: Roll No. 2**, 8 2nd Division: Roll No. 4, 6

3rd Division: Roll No. 7

ADT 201-203 : Tatidang agütsür : 3 Takok angur : 3

1st Division: Roll No. 1, 2*, 3

ADT 301-303: Tatidang agütsür : 1 Takok angur : 1

1st Division: Roll No. 1

PGDT 601-603: Tatidang agütsür : 55Takok angur : 55

1st Division : Roll No. 1*, 2*, 3*, 4***, 5, 7*, 8, 9*, 10*, 11, 13***, 14, 16***, 18*, 19, 22***, 24*, 25, 27, 28***, 29*, 30*, 31, 32***, 33*, 35*, 37*, 38**, 39*, 40**, 41, 42***, 44, 45, 46*, 47**, 48*, 49**, 50*, 51, 52*, 53, 54, 55*, 56***, 57*, 58***, 59, 60*, 61***, 62**, 65**

2nd Division: Roll No. 12, 21, 3rd Division: Roll No. 34

Temetettsü:

- PGDT 701-703 nung tatidang agütsür alir item Roll No.tem iba takoker osang sangdongba anogo nungi ita ka tsüngda tashi nung Dissertation onük (Soft copy nung) office tongtsütsüla. Roll No. 1, 2, 4, 5, 6, 7, 8, 9, 10 & 11
- Roll No. sülen * aliba tetezü marks 80 sür tema anguba tamaütsü alitsü.
- Takok ngua alirtem atema Marksheet Yimpoksüi 5,2025 anogo office nungi angutsü.

Sd/-
Rev. Prof. Rongsen Lkr
Chairman

Sd/-
S. Wati Ozüküm
Secretary

State Level Wushu Championship Kohima nung Oct 28 nungi asayatsü

Kohima, Mongputeni/October 26 (TYO): Nagaland Wushu Association (NWA) aser Department of Youth Resources and Sports na longjemer October 28 aser 29 nü Pele Khezhie Indoor Stadium, Kohima nung 1buba State Level Sub-Junior, Junior aser Senior Wushu (Sanda) Championship ayongzüka asayatsü.

Nagaland Wushu Association sangdong ka ajanga ashiba agi, anogo ana asayatsü aliba asayamung ya Ngaland nung Wushu ya competitive asaya ka ama ajungkettsü aser tashi itshidaktsütsü nükjdong nung ayongzükogo. Kasa mapang nung iba asayamung ajanga lanur asayartem nem parnok sempet sayutsü atema sabang ka agütsütsü aser temaba jenjang nung oa asayatsü atema parnok

renemshitsütsü.

Asayamung lapokba sentong ya October 28 nü 10:00 ako nung agitsü. Iba sentong nung MLA & Advisor, CAWD and Taxes, Government of Nagaland, aser Nagaland Wushu Association Tir Kudecho Khamo alakteta jaoker asütsü.

Maneni sentong nungsa Nagaland Olympic Association aser Nagaland Taekwondo Association Tir Pele Khezhie tetushi tejaoker asütsü.

Asayamung ayongertemi ashiba agi, contingent tem 9:00 ako nung adenshitsü aser iba sülen alakteta jaoker ya 9:40 ako nung tonga arutsü. Asayamung lapokba formal sentong ya 10:00 ako nung tenzüksü.

Nagaland Wushu Association Vice President, Neibou Sechu iba sentong lenir asütsü aser CBCK Youth

Director Deo Huprem-i Tsüngrem temaotsü meshizüka sarasademtsü.

Sentong nungsa tenügsang agütsüba mapang, o jembiba mapang, kentenba, asayartem tenangzüktepba agiba sentongtem agitsü aser Nagaland Wushu Association General Secretary, Vekhozo-i tepela o jembitsü.

Asayamung lapokba sentong tembangba sülen süngojemba mapang alitsü aser tetoktepba ya 12:00 ako nungi tenzüksü.

Iba asayamung nung Nagaland kübok tesem balala nung asayartem Sub-Junior, Junior, aser Senior category tem nung asayaba angutsü. Nagaland kübok district balala nungi asayar 130 dak temai iba asayamung nung shilem agitsü imlar.

Arshdeep Singh Punjab FC nung denogo

Mongputeni/October 26, 2025 (Agencies): Hombarnü AIFF Super Cup nung Kerala FC den mezüngbuba asaya masaya tsünga Punjab FC-i parnok indang goalkeeping unit tashi itshidaktsütsü atema India team nungi goalkeeper Arshdeep Singh den küm ka atema tenangzüktepba yangluogo.

Mahilpur nungi arishi küm 28 tain asayar ya Hyderabad FC nungi tang Punjab FC nung dena kidangi meyipa aruogo. Pa 2017-18 season nung I-League akokba Minerva Punjab indang team nung densema liasü.

Arshdeep ya AIFF Elite Academy nungi anitetba asayar ka aser pa Minerva Punjab nung professional career tenzük aser iba sülen 2019 küm Indian Super League-i ao. Pa Odisha FC, FC Goa, aser Hyderabad FC nungi

asayaogo aser tang tashi nung ISL nung asaya 50 dak tema nung asayar lir.

Punjab FC technical director Nikolaos Topoliatitis-i, local asayartem anitettsü atema club bendanga agütsür aliba nenshia metetdaksü.

"Asayar ajaki pei tasoli tenüng nungi asayaner aser kü atema iba nükjdong ya Pujab FC nung atalokogo. Ni Hoshiarpur kübok Mahilpur nungi lir aser, iba asaya meimba Punjabi nunger agi meketbanger ni inteta liasü," ta pai ashi.

"Arshdeep den tenangzüktepba yangluba atema Punjab FC kanga nema adanger, shibai onok indang goalkeeping unit tashi itshidaktsüba dang masü saka pa ya kidang nungi anitetba asayar ka system nung densemdaktsüba ka asütsü," ta paisa shisem.

BENDANGLI OSANG : Tapak 7 nungi...

Trump-i ketdangsüa Thailand-..

Iba Southeast Asian linük asem atema US indang tariff maneni shilem 19 lir.

Trump tang anogo trok atema Asia semdangba mapang ka lir, aser Brehostibarnü South Korea nung Asia-Pacific Economic Cooperation forum nung shilem agiba mapang pai 2019 küm sülen tang mezüngbuba China Tir Xi Jinping den tejak o tejak na chitepa ajuruteptsü imlar.

Trump Hombarnü Japan-i aotsü, kong pai tawa shimba Ato Kilonser Sanae Takaichi den ajuruteptsü aser iba sülen pa Bodhbarnü South Korea-i aotsü.

Trump den noksa agiba arur oatokogo, saka ceasefire dak sendakba nung osang tejangja memetet aser iba ya benoka inyaktettsü minyaktettsü memetet.

Tenangzüktepba nung arrtsü indang osang tejangja agüja mali, ta Cambodia: From Pol Pot to Hun Sen and Beyond indang author aser osangbener Sebastian Strangio-i ashi.

"Parnoki tongtibangtiba tasüngdangba langzütsü tebilemba maliasü, koba arrtsü latetba aser tesem kar nung mangatettep aliba dak sendaka lir," ta Strangio-i Al Jazeera dang ashi.

"Trump nem pa indang political theatre aser sentong

ka agütsütsü atema aritepba yangluba tenangzüktepba ka asütsüsa liasü. Iba ya July 28 nü ceasefire atema nangzüktepba atsülangshia yanglushiba ka masütsüsa liasü," ta pai shisem.

Strangio-i ashiba agi, ken o aika jembiaka tensa maneni mejungi lir. Ceasefire benokba sülen arrtsü nung maneni mepetmesü adoka arudar aser landmine tem aginba ajanga yimjung asoshi inyakyim tebenjaba kümdaktsütsü.

Sa Kaoe, Thailand nungi Al Jazeera osangbener Tony Cheng-i ashiba agi, Deobarnü sign asüba tenangzüktepba ya taoba mapang nangzükteper aliba benokshiba ka dang lir.

July ita tenangzüktepba yangluba mapang Malaysia nunger sepaitem yoktsü nangzüktep, saka tang tashi yoka mali, ta pai ashi.

Thai nungertemi yimjung atema kechi jenjang südir süaka agiba atema pelar, saka iba tenangzüktepba yagi shitakba mangatettep alibabo mebentetter ta bilemer.

Pai ashiba agi, Thai military-i mangatettep aliba tesem kar merekteta odor aser kasa mapang nung yimtsüng kar nung hopta tsünga bomb nungi jenboa alitsü atema tejenokdak tasen yangludat.

"Anungji nüburtemi kechiang ataloktsüar mejangja," ta pai ashi.

Belinda Bencic-i Pan Pacific Open kokogo

Mongputeni/October 26, 2025 (Agencies): Belinda Bencic-iWTA Pan Pacific Open nung la indang career nung title 10buba benogo. Final asaya nung lai Linda Noskova 6-2, 6-3 agi koka liasü.

Swiss tsürla yagi küm ter sülen Tokyo nung asayaba iba asayamung nung kanga tashi ita asayaogo aser Deobarnü asaya lai tetenzük nungi tatembang tashi amokbanger asaya liasü.

Asaya nung lai Noskova indang serve asemen tashi break asü aser final ya ghonda ka ser minute 22 nung dang koka liasü.

Bencic atema Tokyo indang

venue ya kanga tongtibang lir, kechiyong lai iba tesem nung küm pezü tejakdang Olympic kija asaya nung gold medal aser tarep asaya nung silver medal ngua liasü.

"Nenok jakdang kanga janradema asayaogo. Ni tatemsa iba tesem nung Tokyo Olympics kija asaya koka liasü aser iba mapangbo stadium tazüng liasü, anungji tangbo khenyongi balaka liasü, saka nenok jakdang asayaba ya jangrademtsüka lir. Ni Japan nung asayaner, anungji iba asayamung akokba atema pelar," ta Bencic-i ashi.

Bencic atema final tonga asayatsü kanga melarabo

masü asü, kechiyong la anogo ana tsünga court nung ghonda 5 ser minute 23 asayaogo.

Lai quarterfinal aser semifinal nung Sofia Kenin den asaya ya set asemsem asayaba sülenang koka liasü.

Kasa mapang nung Noskova temelaba final tongtetogo. La quarterfinal aser semifinal na senteper minute 35 dang asaya liasü.

Quarterfinal nung la den asayala asaya tom nung masayatettsüsa aküm aser semifinal nung Elena Rybakina teberem nung timtem aliba ajanga masayatettsüsa küma la nem walkover ka agüja liasü.

Badminton Asia U17, U15 Champ's nung Shaina, Diksha nati gold angu

Mongputeni/October 26, 2025 (Agencies): Badminton Asia U17 & U15 Championships 2025 nung Deobarnü Shaina Manimuthu (U15) aser Diksha Sudhakar (U17) nati pei tata asaya nung gold medal nguogo. India team-i iba asayamung nung tang tashi nung taküm tajungtiba asayaogo.

U15 tetsür kija asaya final nung Shaina-i Japan tsür Chiharu Tomita 21-14, 22-20 agi akok, aser iba sülen Diksha Sudhakar-i U17 tetsür kija asaya final nung külem India tsür Lakshya Rajesh 21-16, 21-9 agi koka liasü. Diksha ya Junior Asian Championships nung U17 title abenba mezüngbuba India nunger kija asayar kümogo.

Deobarnü medal asem tashi anguba tetezü India team-i gold ana, silver ka aser bronze medal

ana bener kidangi meyipa arutsü.

India team-i tatemsa iba asayamung nung 2013 küm gold medal ana ngur liasü. Iba küm Siril Verma-i U15 tebur kija asaya akok aser Chirag Shetty aser MR Arjun nati U17 tebur tarep asaya koka liasü.

Deobarnü Shaina ya U15 nung gold medal anguba India tsürtem rongnung pezübula aküm. Final asaya nung lai Tomita amokbanger asaya aser asaya ya minute 44 nung dang koka liasü.

Iba sülen Diksha-ia U17 title bena la ya India tsürtem rongnungi U17 title abenba mezüngbuba asayar aküm.

Tebur kija asaya nung Jagsher Singh Khanggura aser tarep temeyoktep asayar Jangjeet Singh Kajla aser Jananika Ramesh nungeria Honibarnü bronze medal ngua

liasü.

Tarep temeyoktep asaya semifinal nung Jangjeet Singh Kajla aser Jananika Ramesh nati 17-21, 21-18, 21-16 agi Chinese Taipei nunger An Chang aser Yo Han Wang na mekoki liasü.

Kasa mapang nung tebur kija semifinal asaya nung Jagsher Singh Khangurra-i 21-11, 21-16 agi China nunger asayar Hong Tian Yue makok.

Iba asayamung nung India nunger medal angurtem:

Diksha Sudhakar - gold medal; U17 girls' singles

Shaina Manimuthu - gold medal; U15 girls' singles

Lakshya Rajesh - silver medal; U17 girls' singles

Jagsher Singh Khangurra - bronze medal; U17 boys' singles

Jangjeet Singh Kajla aser Jananika Ramesh - bronze medal; U17 mixed doubles.